

# 唐詩紀事

〔宋〕計有功撰

722  
68

〔宋〕計有功撰

唐詩紀事  
下

中華書局

# 唐詩紀事卷第四十一

白行簡

章孝標

施肩吾

鮑溶

孟簡

李程

張蕭遠

許康佐

許堯佐

張南史

朱晝

侯喜  
劉師服、軒轅彌明

蔣防

## 白行簡

春從何處來詩云：欲識春生處，先從木德來。入門潛報柳，度嶺暗驚梅。透雪寒光散，銷冰水鏡開。曉迎郊綺發，夜逐斗光回。淑氣寅中變，新聲雨後催。偏宜資律呂，應是候陽臺。

在巴南望郡南山云：臨江一嶂白雲間，紅綠層層錦繡斑。不作巴南天外意，何殊昭應望驪山。樂天和云：返照前山雲樹明，從君苦道似華清。試聽腸斷巴猿叫，早晚驪山有此聲？時樂天在忠州。

九日作云：降虜（一）意何如，窮荒九日初。三秋異鄉客，一紙故人書。對酒情無限，開緘思有餘。感時空寂寞，懷舊幾躊躇。鴈盡平沙迴，煙銷大漠虛。登臺南望處，掩淚對雙魚。

行簡以瀘水羅賦得名，其警句云：焦螟之生必全，有以小爲貴者；江漢之流雖大，盡可以一貫之。又曰：夕掛于壁，如滿月之在天；曉用於人，狀圓荷之映水。

行簡，字知退，敏而有詞。元和二年登第，爲度支郎中。寶曆二年卒。

行簡小字阿憐，樂天同宿湖亭詩云：潯陽少有風情客，招宿湖亭盡却迴。水檻虛涼風月好，夜深惟有阿憐來。

行簡恩賜章服，樂天以詩寄之云：吾年五十加朝散，爾亦今年賜章服。齒髮恰同知命歲，官銜俱是客曹郎。予兄弟年五十，賜緋，俱是主客都官。榮傳錦帳花聯萼，彩動綾袍雁趁行。大抵着緋宜老大，莫嫌秋鬢數莖霜。

### 章孝標

孝標元和十三年下第，時輩多爲詩以刺主司，獨孝標爲歸燕詩留獻，侍郎庾承宣得詩展轉吟諷；庾果重典禮曹，孝標來年登第。詩云：舊壘（一）危巢泥已落，今年故向社前歸。連雲大廈無棲處，更望誰家門戶飛？

孝標及第除正字，東歸題杭州樟亭驛云：樟亭驛上題詩客，一半尋爲山下塵。世事日隨流水去，紅花還似白頭人。初成落句云：紅花直（二）笑白頭人，改爲還似。且曰：我將老成名，似我芳豔，詎能久乎！及還鄉而逝。或曰：前有八元，後有孝標，皆桐廬人，復同姓而皆不達。

李紳鎮揚州，請孝標賦春雪詩，命題於臺盤上。孝標唯然，索筆一揮云：六出花飛處處飄，粘窗拂砌上寒條。朱門到晚難盈尺，盡是三軍喜氣消。

孝標及第後寄紳曰：及第全勝十改官，金鞍鍍了出長安。馬頭漸入揚州郭，爲報時人洗眼看。紳以一

絕箴之曰：假金方用真金鑲，若是真金不鍍金。十載長安得第一〔三〕，何須空腹用高心！

孝標，大和中山南東道從事，試大理評事。

明日鑾輿欲向東，守宮金翠帶愁紅。九門佳氣已西去，千里花開一夜風。無題。右張爲取爲主客圖。

歸海上舊居云：鄉路遶兼葭，縈紆出海涯。人衣被蜃氣，鳥跡印鹽花。草沒題詩石，潮推坐釣槎。還歸舊窗裏，凝思賞煙霞。

長安秋日云：田家無五行，水旱卜蛙聲。牛犢乘春放，兒孫候暖耕。池塘煙未起，桑柘雨初晴。歲晚香膠熟，村村自送迎。右二詩韋莊又玄集取之〔四〕。

### 施肩吾

肩吾，洪州人。元和十年登第，以洪州西山羽化之地，慕其真風，高蹈於此。爲詩奇麗，著百韻山居詩，才情富贍。如荷翻紫蓋搖波面，蒲瑩青刀插水湄。又煙〔二〕黏薜荔龍鬚軟，雨壓芭蕉鳳翅垂。

贈邊將詩云：輕生奉國不爲難，戰苦身多舊箭瘢。玉匣鎖龍鱗甲冷，金鈴襯鵲羽毛寒。皂貂擁出花當背，白馬騎來月在鞍。猶恐犬戎臨虜塞，柳營時把陣圖看。

上禮部侍郎陳情云：九重城裏無親識，八百人中獨姓施。弱羽飛時攢箭險，寒驢行處薄冰危。晴天欲照盆難反，貧女如花鏡不知。却向從來受恩地，再求青律變寒枝。

贈友入下第閑居云：花眼綻紅斟酒看，藥心抽綠帶煙鋤。皆輕巧之極。

惜花云：落盡萬株紅，無人解繫風。今朝芳徑裏，惆悵錦機空。

隋曲有疎勒鹽，唐曲有突厥鹽、阿鵲鹽。或云關中人謂好爲鹽，故肩吾詩云：顛狂楚客歌成雪，媚賴吳娘笑是鹽。蓋當時語也。今杖鼓譜中尙有鹽〔三〕杖聲。

效古興云：金雀無舊釵，綉綺無舊裾。唯有一寸心，長貯萬里夫。南軒夜蟲織已促，北牖飛蛾遶殘燭。祇言衆口鑠千金，誰信獨愁銷片玉。不知歲晚歸不歸，又將啼眼縫征衣。

夜宴曲云：蘭缸如晝曉〔四〕不眠，玉爐夜起沉香煙。青娥一行十二仙，欲笑不笑桃花燃。碧窗弄嬌梳洗晚，戶外不知雲漢轉。被郎嗔罰屠酥盞，酒入四肢紅玉軟。

肩吾有年來如拋梭，不老應不得之句。又及第後過揚子江詩云：憶昔將貢年，抱愁此江邊。魚龍互閃鑠，白浪高於天。今日步青草，還來經此道。江神也世情，爲我風色好。右張爲取作主客圖。

張籍贈詩云：世間漸覺無多事，難得空名未着身。合取藥成相待喫，不須先作上天人。又送肩吾東歸云：知君本是煙霞客，被薦因來城闕間。世業偏臨七里瀨，仙遊多在四明山。早聞詩句傳人徧，新得科名到處閑。惆悵灞亭相送去，雲中琪樹不同攀。

## 鮑溶

岐路詩云：北風送微寒，徒侶勤遠程。憂人席不暖，殘月馬上明。飄飄岐路間，長見日初生。重嶂曉色淺，疎猿寒啼清。人間多岐路，常恐終身行。迴見四方人，車輪無留聲。空谷亦堪隱，下田非懶耕。古

人有遺訓，飽食非親榮（二）。我生禮義鄉，少小見太平。聖賢猶羈旅，況復非其名。

長城作云：蒙公虜生人，北築秦氏冤。禍興蕭牆內，萬重防禍根。城成六國亡，宮闕啓千門。生人半爲土，何用空中原。奈何家天下，骨肉尙無恩。投沙擁海水，安得不久翻。乘高慘人魂，寒日易黃昏。枯骨貫朽鐵，沙中如有言。萬古驪山葬，誰知野火燔！

秋暮山中寄李益端公云：舊事與日遠，酒花仍舊香。前年繡衣客，此節過此堂。侍臣不自高，笑解繡衣裳。眠雲有餘態，人鳥不亂行。我恐雲嵐色，損君鞍馬光。君言此何言？且共覆前觴。古人重一笑，買日輕金裝。日盡秉燭遊，千年不能忘。君言此何言？明日皆異鄉。明日非今日，山下道路長。一從山下去，天地再炎涼。此期果難得，夢君馬玄黃。

許渾過鮑溶宅有感云：寥落故人宅，重來身已亡。古苔殘墨沼，深竹舊書堂。秋色館池靜，雨聲雲木涼。無因展交道，日暮倍心傷。

溶，登元和進士第，與韓愈、李正封、孟郊友善。

溶有途中句云：躍馬非壯歲，報恩無高功。斯言化爲火，日夜焚深衷。又上太原王尚書云：天王委管籥，開閉秦北門。頂戴日月光，口宣雨露言。又秋懷句云：萬里岐路多，一身天地窄。右張爲主客圖取溶爲工用博解宏拔主。

## 孟簡

惜分陰詩云：業廣因功苦，拳拳志士心。九流難酌挹，四海易消沉。對景嗟移晷，窺園詎改陰。三冬勞聚學，駟景重兼金。刺股情方勵，偷光思益深。再中如可冀，終嗣絕編音。

元和中，簡將試，詣日者卜之，曰：近東門坐，即得之矣。既入，即坐西廊。迫晚，忽得疾，隣坐請與終篇，見其姓，即東門也，乃擢上第。

簡，字幾道，德州人。元和中，爲戶部侍郎，以賊貶。後以太子賓客分司卒。尤工詩，尙節義。

簡擬古云：劍客不誇怨，主人知取心。但營纖毫義，肯許千萬金。勇則看鷲擊，憤來聽虎吟。平生貴醇德，刃敵無幽深。

## 李程

程貞元中試五色賦，破題云：德動天鑒，祥開日華。其卷已黜，楊於陵質之主文呂謂：於是已落重收。詠冰壺云：琢玉性惟堅，成壺體更圓。虛心含衆象，應物受寒泉。溫潤資天質，清真稟自然。日融光自散，雪映色逾鮮。至鑒功寧宰，無私照豈偏。明將水鏡對，白與粉闌連。拂拭終爲美，提攜佇見傳。勿令毫髮累，遺恨綴成篇。

程，字表臣。爲翰林學士，日過八塲，乃至，時號八塲學士。寶曆二年爲相，最爲帝所重，曰：高飛之翮，長者在前。卿朝廷羽翮也。



## 張蕭遠

履春冰詩云：一步一愁新，輕輕恐陷人。薄光全透日，殘影半銷春。蟬想行時翼，魚驚躍處鱗。底（二）虛難駐足，岸闊怯迴身。豈暇踟躕久，寧辭顧盼頻。願將兢慎意，從此赴通津。

觀燈云：十萬人家火燭光，門門開處見紅粧。歌鐘喧夜更漏暗，羅綺滿街塵土香。星宿別從天畔出，蓮花不向水中芳。寶釵驟馬多遺落，依舊明朝在路傍。

蕭遠元和進士登第，與舒元興聲價俱美。出廣輿言（二）。

秦雲寂寂僧還定，盡日無人鹿遶牀。句。日暮風吹官渡柳，白鷄飛出石頭牆。廢城句。雙雙白燕入祠堂。乳石洞玉女祠句。右張爲取作主客圖。

張籍有弟蕭遠雪夜同宿詩云：數卷新遊蜀客詩，長安僻巷得相隨。草堂深夜攜琴宿，說似青城館裏時。

## 許康佐

白雲起封中詩云：英英白雲起，呈瑞出封中。表聖寧依地，逢時豈待風。浮輝迷皎潔，流影忽冲融。自叶堯天美，誰言漢日同。泥金光乍掩，檢玉氣俄通。猶願非煙瑞，亭亭不散空。

元稹酬許五康佐詩云：猿啼三峽雨，蟬報兩京秋。珠玉慙新贈，芝蘭忝舊遊。他年問狂客，須向老農求。

康佐以中書舍人爲翰林侍講學士，與王起皆爲文宗寵禮。帝讀春秋，至閹弑吳子餘祭，問閹何人耶？

康佐以中官方彊，不敢對。帝嘻笑。後問李訓，訓曰：國君不近刑人，以爲輕死之道。帝曰：朕近刑人多矣，得不慮哉！訓曰：列聖知而不能遠，惡而不能去，陛下念之，宗廟福也。於是內謀翦除矣。康佐終於禮部尙書。

### 許堯佐

金谷懷古云：石氏遺文在，淒涼見故園。清風思奏樂，衰草念行軒。舞榭蒼苔掩，歌臺落葉繁。斷雲歸舊壑，流水咽新源。曲沼殘煙斂，叢篁宿鳥喧。唯餘池上月，猶似對金樽。

康佐諸弟，皆第進士，而堯佐最先進；又舉宏詞爲太子校書郎。八年，康佐繼之。堯佐，貞元十六年與燉煌張宗本、滎陽鄭權皆佐征西府。後位諫議大夫，卒。

### 張南史

陸滕宅秋雨中探韻云：同人永日自相將，深竹閑園偶辟疆。已被秋風教憶鱸，更聞寒雨勸飛觴。歸心莫問三江水，旅服徒霑九月霜。醉裏欲尋騎馬路，蕭條幾處有垂楊。

送朱大北遊云：歲暮一爲別，江湖聊自寬。且無人事變，誰爲客行難？郢曲憐公子，皇州憶伯鸞。蒼蒼遠山際，松樹獨宜寒。

南史好弈碁，其後折節讀書，遂入詩境。李端哭之云：諫草文猶在，圍碁智不如。高仲武云：張君弈碁者，中年感激，苦節學文，數年間稍入詩境。如已被秋風教憶鱸，更聞寒雨勸飛觴，事與物力俱矣。

南史，字季直，幽州人。以試參軍，避亂居揚州。再召，未赴而卒。

錢起贈南史云：紫泥何日到滄洲，笑向東陽沈隱侯。黛色晴峯雲外出，穀紋江水縣前流。使臣自欲論公道，才子非關厭薄遊。溪畔秋蘭雖可佩，知君不得少停舟。

## 朱 晝

贈友人古鏡云：我有古時鏡，初自壞陵得。蛟龍猶泥蟠，魑魅幸月蝕。摩久見菱蕊，青於藍水色。贈君將照心，無使心受惑。

喜陳懿老示新製云：一別一千日，一日十二憶。苦心無閑時，今夕見玉色。玉色復何異，紅明含羣德。有文如星宿，飛入我胸臆。憂愁方破壞，懽喜重補塞。使我心貌全，且非黃金力。將攀下風手，願假仙鸞翼。予欲見詩人孟郊，故寄誠於此。

賦得花藤藥合寄頽陰故人云：藤生南海濱，引蔓青且長。剪削爲花枝，何人無文章。非才亦有心，割骨聞餘芳。繁葉落何處，孤貞在中央。頽盛黃金膏，寄與青眼郎。路遠莫知意，水深天蒼蒼。書，元和間進士。

## 侯 喜劉師服、軒轅彌明

韓退之石鼎聯句詩序云：元和七年十二月四日，衡山道士軒轅彌明，舊與進士劉師服衡湘中相識，師服在京，夜抵其居宿。有校書郎侯喜，新有能詩聲，夜與劉說詩。彌明指爐中石鼎曰：子能爲我賦此乎？

喜卽援筆賦之，彌明繼焉。詩曰：妙匠斲山骨，剝中事煎烹。師服。直柄未當權，塞口且吞聲。喜。龍頭縮  
 菌蠢，豕腹脹膨脝。彌明。外苞乾蘚文，中有暗浪驚。師服。在冷足自安，遭焚意彌貞。喜。謬當鼎鼐  
 間，妄使水火爭。彌明。大若烈士膽，圓如戰馬纓。師服。上比香爐尖，下與鏡面平。喜。秋瓜未落蒂，凍芋  
 彊抽萌。彌明。一塊元氣閉，細泉幽竇傾。師服。不值輸寫處，焉知懷抱清。喜。方當洪爐然，益見小器  
 盈。彌明。院院無刃跡，團團類天成。師服。遙疑龜負圖，出曝曉正晴。喜。旁有雙耳穿，上爲孤髻撐。彌  
明。或訝短尾銚，又似無足鐙。師服。可惜寒食毬，擲在路傍坑。喜。何當出灰炮，無計離瓶罌。師服。  
 陋質荷斟酌，狹中愧喜提擎。師服。豈能煮仙藥，但未汚羊羹。喜。形模婦女笑，量度兒童輕。彌明。徒爾  
 堅重性，不過升合盛。師服。仍似廢轂仰，側見折軸橫。喜。時於蚯蚓竅，微作蒼蠅鳴。彌明。以茲翻溢  
 僊，實負任使誠。師服。常居顧盼地，敢有漏泄情。喜。寧依暖熱弊，不與寒涼并。彌明。區區徒自效，瑣  
 瑣不足呈。師服。迴旋但兀兀，開合唯鏗鏗。喜。全勝珊瑚貴，空有口傳名。豈比俎豆古，不爲手所撻。磨  
 礪去圭角，浸潤著光明。願君莫嘲諑，此物方施行。四韻並是彌明作也。始，師服。援筆題首句，授喜，喜綴其  
 下云云。道士笑曰：子詩如是而已乎！即袖手竦肩，傍北牆坐，謂劉曰：吾不解世俗書，弟子爲我書吾  
 句。因高吟龍頭豕腹一聯。初不似經意，詩旨有似譏喜。二子相顧慙駭，欲以多窮之。道士不用意而  
 功益奇，不可附說，語皆侵劉、侯。二子思竭，不能續。道士曰：章不可不成。命劉把筆，唱出  
 四十字爲八句。讀畢，謂二子曰：此皆不足與語，此寧爲文耶！吾所能，子皆不足聞也。二子驚  
 惋自失。

## 蔣防

春風扇微和詩云：麗日催遲景，和風扇早春。暖浮丹鳳闕，韶媚黑龍津。澹蕩迎仙仗，霏微送畫輪。綠搖官柳散，紅待禁花新。舞席皆迴雪，歌筵暗送塵。幸當陽律候，惟願及佳辰。

望禁苑祥光詩云：嘉瑞生天色，葱蘢幾效祥。樹搖三殿側，日映九城傍。仙霧今同色，卿雲未可章。拱汾疑鼎氣，臨渭比熒光。豈並春風舊，俄同聖壽長。微臣時一望，短羽欲翱翔。

冬至日祥風應候詩云：節逢清景空，氣占二儀中。獨喜登高日，先知應候風。端呈光舜化，慶表〔二〕盛堯聰。況與承時叶，還將入律同。微微萬井逼，習習九門通。遶殿爐煙起，殷勤報歲功。

杜賓客永豐里新居云：退跡居三逕，辭榮繼二疎。聖情容解印，帝里許懸車。已去龍樓籍，猶分御廩儲。風泉輸耳目，松竹助玄虛。調護心常在，山林思有餘。應嗤紫芝客，遠就白雲居。

元和中，李紳及防薦龐嚴爲翰林學士，李逢吉誣紳罪，逐之，出嚴刺信州，防刺汀州。于敖封還詔書，搢紳意伸其枉，曰：于給事犯宰相之怒，申龐、蔣之屈，不亦善乎？奏下，乃論貶嚴太輕，衆嗤譟。防作連州廖先生碑銘云：長慶末，余自尚書司封郎中、知制誥翰林學士，出守臨汀，尋改此郡。

【校記】

白行簡

〔一〕『降虜』原作『降慮』，據汲古閣本及全唐詩改。

章孝標

〔一〕『壘』原作『累』，據汲古閣本及全唐詩改。

〔三〕『直』原作『真』，據汲古閣本改。

〔三〕『一第』原作『第

一』，據汲古閣本及全唐詩改。

〔四〕『取之』二字原脫，據全唐詩話補。

施肩吾

〔一〕『煙』原作『經』，據汲古閣本改。

〔二〕『賴』汲古閣本作『嫵』。

〔三〕『鹽』原作『炎』，據汲古閣本改。

〔四〕『曉』原作『賈』，據汲古閣本改。

鮑溶

〔一〕『榮』原作『繁』，據汲古閣本及全唐詩改。

孟簡

〔一〕『取』全唐詩作『此』。

李程

〔一〕『累』原作『黑』，據汲古閣本及全唐詩改。

張蕭遠

〔一〕『底』原作『風』，據汲古閣本及全唐詩改。

〔二〕『撫』原作『穰』，據汲古閣本改。『廣撫言』疑是『唐撫言』。

之誤。

許堯佐

〔一〕『校』原作『授』，據新唐書百官志改。

侯喜

〔一〕『貞』原作『亨』，據汲古閣本及全唐詩改。

二字原脫，據全唐詩補。

〔四〕『又』原作『大』，據汲古閣本及全唐詩改。

〔五〕『愧』原作『貴』，據汲古閣本及

全唐詩改。

〔六〕『師服』二字原脫，據全唐詩補。

〔七〕『喜』字原脫，據全唐詩補。

〔八〕『道士不用意

而功益奇』，原作『道士不用意益切奇出』，據全唐詩改。

〔九〕『語』字原無，據全唐詩補。

〔一〇〕『能』原作

『聞』，據全唐詩改。

蔣防

〔一〕『慶表』原作『表慶』，據全唐詩改。

# 唐詩紀事卷第四十二

王涯

令狐楚

張仲素

王涯

獻壽詞云：宮觀參差列九重，祥雲瑞氣捧堦濃。微臣欲獻南山壽，遙指南山對袞龍。

遊春詞云：曲江絲柳變煙條，寒谷冰隨暖氣消。纔見春光生綺陌，已聞清樂動雲韶。又云：經過柳陌與桃蹊，尋逐春光著處迷。鳥度時時衝絮起，花繁袞袞壓枝低。

秋思云：網〔一〕軒涼吹動輕衣，夜聽更長玉漏稀。月渡天河光轉濕，鵲驚秋樹葉頻飛。又云：宮連太液見滄波，暑氣微消秋意多。一夜輕風蘋末起，露珠翻盡滿池荷。

從軍詞云：旄頭夜落捷書飛，來奏金門着賜衣。白馬將軍頻破敵，黃龍戍卒幾時歸？

塞下曲云：辛勤幾出黃花戍，迢遞初隨細柳營。塞晚每愁殘月苦，邊秋更逐斷蓬聲。又云：年少辭家從冠軍，金裝寶劍去邀勳。不知馬骨傷寒水，唯見龍城起暮雲。

平戎詞云：太白秋高助發兵，長風夜卷虜塵清。男兒解却腰間劍，喜見從王道化平。又云：塞虜常爲敵，邊聲已報秋。平生多志氣，箭底覓封侯。

從軍詞云：戈甲從軍久，風雲識陣難。今朝拜韓信，封日斬成安。又云：燕領多奇相，狼頭敢犯邊。寄



言班定遠，正是立功年。

隴上行云：負羽到邊州，鳴笳度隴頭。雲黃知塞近，草白見邊秋。

閨人贈遠云：花明綺陌春，柳拂御溝新。爲報遼陽客，流芳不待人。又云：遠戍功名薄，幽閨年貌傷。妝成對春樹，不語淚千行。又云：形影一朝別，煙波千里分。君看望君處，祇是起行雲。又云：戴勝飛晴野，淩澌下濁河。春風樓上望，誰見淚痕多。

春江曲云：搖漾越江春，相將看白蘋。歸時不覺夜，出浦月隨人。又云：家寄征江岸，征人幾歲遊。不如潮水信，每月到沙頭。又云：乘曉南湖去，參差疊浪橫。前洲在何處，露裏鴈嚶嚶。

塞下曲云：三戍漁陽再渡遼，駢弓在臂劍橫腰。匈奴欲似知名姓，休傍陰山更射鵰。又云：獵馬千羣鴈幾雙，燕然山下碧油幢。傳聲漠北單于破，火照旌旗夜受降。又云：朔雪飄飄開鴈門，平沙歷亂卷蓬根。功名恥計擒生數，直斬樓蘭報國恩。又云：隴水潺湲隴樹秋，征人到此淚雙流。鄉關萬里無因見，西戍河源早晚休？又云：陰磧茫茫塞草腓，枯槁烽上暮煙飛。關河北望天連海，蘇武曾將漢節歸。

漢苑（三）行云：二月春風變柳條，九天清樂奏雲韶。蓬萊殿後花如錦，紫閣街前雪未銷。又云：迴鴈高翻太液池，新花低發上林枝。年光到處皆堪賞，春色人間總未知。又云：春風澹蕩影悠悠，鸞囀高枝燕入樓。千步回廊聞鳳吹，珠簾處處上銀鈎。

閨思云：洞房今夜月，如練復如霜。爲照離人恨，亭亭到曉光。

涯，字廣津，博學，工屬文，梁肅、陸贄異其才。元和中爲相，又相穆宗。至文宗時，李訓敗，遂及禍。